



Kalaallit Nunaani eqqartuussisarnermik inatsisip aamma pisortat ingerlatsinerat pillugu inatsisip allangortinneqarneri pillugit inatsisissatut siunnersuutip (Allagaatinik takunnissinnaatitaaneq, pinerluttulerineq pillugu inatsiseqartitsineranut atatillugu eqqartuunneqarnissamut imaluunniit pillagassanngortitsinissamut suliaassanngortitsineranut atatillugu politiinit, unnerluussisussaataasunit imaluunniiteqqartuussivinnit inuup kiffaanngissusianut pinngitsaaliilluni akuliunnerit aallartinneqarnerat, ilisimannittut kinaassusaasa isertuunneqarnerat aamma digitaliusumik nalunaarutiginninneq aamma piuminarsakkamik digitaliusumik nalunaartiginninneq) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut

(Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)
(Siullermeerneqarnera)

Demokraatit iluarisimaarinnittorujussuupput, sammisat arlallit, danskit naalagaaffiannit akisussaaffigineqartut, pitsanngorsarneqarnissaannik kissaateqartoqartoq. Sapaatip akunnera kingulleq oqaaseqartartut ilanngussatsinni eqqartuussisarnermi inatsimmut tunngatillugu oqaatigaarput, tunngaviusumik isumaqarluta, Naalagaaffeqatigiinnerup iluani periarfissat pisinnaatitaaffiillu assigiittariaqartut. Taassumalu saniatigut suliniutinut arlalinnut, uani siunnersuummi taakkartorneqartunut isumaqatiginninneq, tulluussaaitut naliginnaasutut isigalugit maanngaaniit allatut aalajanginnginnitsinni. Ingerlariaatsinik assigiinngitsunik marlunnik ingerlatsinerput uagut paasinnittaaserput malillugu Kalaallit Nunaanni innuttaasunik inatsisitigut innarlitsaalisaanermik sunniutikitsitsivoq.

Siunnersuutilli uuma iluani suliniut erseqqissarusupparput, pingaarutilerujussuuartut. Ilisimannittunik illersuineq pisinnaatitaaffik pitsaasorujussuuvoq, inuiaqatigiit ima ikitsigigatta, imaattoqariaasaartarpoq, pinerluttoqarsimatillugu ilisimannittup paasissutissanik isertuussinera. Pinerluttoq aqqusinermi naapinnissaanik ernumassuteqarnikkut aamma/imaluunniit ajornerpaamik pisoqassappat orninneqarnissani inuunerminillu siorasaarneqarnissani pissutigalugit.

Naalakkersuisut missingiummut oqaaseqaatimini nassuiarparaa, pinerlunniarnerit annertusillutillu amerliartortut. Allanguuteqarnikkut eqqartuussisarnermik inatsimmi isumaqarpugut, ingerlatsinermi suliaassaasq, kalaallit nunaanni politiinit eqqartuussisunullu pisariillisaasusaaq. Politikki tusagaqarfigerusupparput, tassani qanoriliorlutik Naalakkersuisut inuusuttut pinerlunniartarnerat annikillisinnaarneraat, aammalu qanoq kalaallit nunaanni pinerluttaaliuineranut siunnersuisoqatigiit akuutinneqarsinnaanersut?

Siusinnerusukkut Inatsisartut ataatsimiineranni Istanbul-mut isumaqatigiisummut peqataaniarluta, aammalu persuttaasarnermut ersarissumik naatsorsoruminartumillu pinaveersaartitsinermik tapersorsoruminartumik siunnersuutiginikuuarput, taakkulu amigaataasorinarput Naalakkersuisut



paasissutissiissutaannut inuusuttut pinerlunniartarnerat annertusisimasooq aammalu pinerlunniarnerit sakkortusiartortut. Kalaallit Nunaanni pinerluttaaliuinermit siunnersuisooqatigiit iliuusissamik 2021-2024¹ atuutussamik sanasimapput suleqatigiinnissamik isumaqatigiissusiornissaat siunertaralugu, piffinni suleqatigiinnissanik pilersitsisoqarnissaa aammalu angajoqqaat akisussaassusaasa immikkut ukkatarineqarnissaannik inuusuttut akornanni pinerlunniarnernut tunngatillugu. Suliniutilli taakkua nalilersornissaannut piffissanngorsimanerpa? Nukiit eqqortumik atorpagut? Tassa apeqquterujussuaq. Taamaalorsimaguttami, sooq taama annertutigisumik pinerluttuliornernik suli takujuarpugut?

Apeqquterpassuupput, isumarput malillugu, maani inersuarmi immitsinnut sapiissuseqarluta apeqqutigisinnaasaraluagut. Maani nunatsinni inatsisit nutarterlugillu atuutilersittaannaqinagit, Danmarkimit aalajangersorneqarsimasut.

Taamatut oqaasertalerlugu, siunnersuut ataatsimiititaliami suliassanngorlugu ingerlateqqipparput, tassani kissaatigigatsigu kingunerisinnaasai eqqortut isummersorfigisinnaassallugit aammalu nutaanik suliniutinut isumaqataanitsigut kinguneqartinneqartussanik.

Naalakkersuisut namminersortunut aningaasatigut allaffissornikkullu kingunissaatut allappaat, internettimik siammarterisut aningaasartuuteqassasut nittartakkanut ilaannut matutitsinissamut piviusunngortitsinermi. Taamaattumik pisariaqartumik mianersuussisoqarnissaa qulakkeerneqartariaqarpoq, namminersortunut aningaasartuutit amerlinerisigut ipisinneqannginniassammata, nunami kisermaassilluni ingerlatsiffioqisumik pisortallu allaffeqartumi, allingaluttuinnarnermigut namminersortunik ipisitsigaluttuinnartumi.

¹ <https://dkr.dk/Media/637569160642567496/PiSiu%20-%20Strategi%202021-2024.pdf>